

POGLAVLJE 3: PRAVO POSLOVNOG NASTANJIVANJA I SLOBODA PRUŽANJA USLUGA

Acquis obuhvaćen ovim poglavljem je horizontalne prirode, pokriva veliki broj raznih oblasti i profesija i uključuje mnoge javne i/ili polujavne institucije i organe.

Države članice moraju da obezbijede da **pravo na poslovno nastanjivanje** državljana EU i pravnih lica u bilo kojoj državi članici, i sloboda pružanja prekograničnih usluga, na način definisan članovima 49. i 56. Ugovora o funkcionisanju Evropske unije, ne smiju biti onemogućeni nacionalnim zakonodavstvom, uz poštovanje izuzetaka definisanih Ugovorom.

Ključni dijelovi *acquis-a* u ovoj oblasti su **Direktiva 2006/123 o uslugama na unutrašnjem tržištu (Direktiva o uslugama)**, koja se u velikoj mjeri zasniva na sudskoj praksi Evropskog suda i **Direktiva 2005/36/EZ o priznavanju stručnih kvalifikacija** (Direktiva o stručnim kvalifikacijama).

Cilj Direktive o uslugama je da u pružanju usluga uspostavi jedinstveno unutrašnje tržište, otklanjanjem pravnih i administrativnih prepreka razvoju uslužnih djelatnosti između država članica. To zahtijeva sveobuhvatnu analizu trenutnog i budućeg pravnog poretka država članica, sa ciljem identifikovanja pravnih i administrativnih prepreka na nacionalnom, regionalnom ili lokalnom nivou, koje nisu u skladu sa pravom Evropske unije.

Provođenje Direktive o uslugama zahtijeva od država članica da preduzmu kombinovano zakonodavne i nezakonodavne, tj. organizacione ili praktične mjere. Direktiva predstavlja horizontalni instrument koji pokriva širok spektar različitih usluga i koja utiče na značajan broj nacionalnih zakona i podzakonskih akata.

Države članice zadržavaju pružanje značajnog broja usluga (što, između ostalog, uključuje zdravstvo i privredu) za stručnjake koji imaju odgovarajuće kvalifikacije. Uzajamno priznavanje kvalifikacija stečenih u različitim državama članicama stoga predstavlja vrlo važan element za djelotovorno ostvarivanje prava od strane građana EU na poslovno nastanjivanje i prava na povremeno ili privremeno pružanje prekograničnih usluga. Cilj Direktive o stručnim kvalifikacijama je, dakle, da se olakša pristup stručnjaka istoj profesiji u drugoj državi članici, u onoj mjeri u kojoj ta druga država osigurava pristup toj profesiji stručnjacima sa odgovarajućim kvalifikacijama. Ova Direktiva je horizontalni instrument koji pokriva sve regulisane profesije koje nisu obuhvaćene drugim instrumentima prava EU koji se bave pitanjima uzajamnog priznavanja.

Provedbeno zakonodavstvo za Direktivu o uslugama

Države članice moraju da posjeduju nacionalne odredbe obavezujuće prirode, kako bi pružaoci i primaoci usluga mogli da se oslone na prava koja su im data Direktivom o uslugama. Neki od članova Direktive mogu se primijeniti izmjenama i dopunama postojećih pravnih propisa. Na primjer, članovi koji se odnose na sistem odobrenja mogu se u pojedinim državama članicama primijeniti izmjenama i dopunama nacionalnih propisa koji se tiču upravnih postupaka. U drugim slučajevima, posebno u vezi sa članovima kojima se utvrđuju opšti principi, kao što su član 16. ili 20, treba razmatrati novi horizontalni okvir propisa.

Države članice takođe mogu prilagoditi određene postojeće pravne propise koji sadrže zahtjeve za koje Direktiva izričito nalaže da se izmijene ili ukinu. Naročitu pažnju treba posvetiti pravnim propisima koji sadrže posebna pravila za pružaoce usluga, uspostavljena u drugim državama članicama. Ukoliko takva pravila nisu u skladu sa Direktivom i nisu zasnovana na drugim instrumentima EU, treba ih ukinuti izmjenama i dopunama propisa na koje se odnose.

Nezakonodavne provedbene mjere za Direktivu o uslugama

Pojedine odredbe Direktive zahtijevaju provođenje usvajanjem odgovarajućih upravnih

rješenja i procedura. To je, na primjer, slučaj sa uspostavljanjem jedinstvenih kontakata i elektronskih procedura. Ovo se takođe odnosi na proces utvrđivanja i procjene pravnih propisa koji će države članice morati provesti prije nego što donesu odluku da li propise treba izmijeniti i dopuniti ili ukinuti (na primjer, moraće da provjere opravdanost svojih sistema odobrenja ili da analiziraju propise i utvrde relevantne zahtjeve).

Osim toga, pojedine odredbe Direktive obavezuju države članice da podstiču aktivnosti privatnih subjekata. Konačno, čitavo poglavlje o "Upravnoj saradnji" zahtijeva da se ustanove praktične mjere koje su neophodne nadležnim organima u državama članicama za međusobnu efikasnu saradnju.

Provedbene mjere za Direktivu o stručnim kvalifikacijama

Provedba Direktive zahtijeva kombinaciju zakonodavne i nezakonodavne inicijative. Potrebna su administrativna pravila i strukture kako bi se osiguralo odgovarajuće ispitivanje, ocjenjivanje i priznavanje stranih kvalifikacija. To uključuje procese elektronskog priznavanja, kao što je Evropska profesionalna iskaznica, koja pokriva određena zanimanja i nameće stroge rokove za postupanje. Potrebno je uzeti u obzir mogućnost uvođenja kompenzacijskih mjera onoliko koliko je dozvoljeno Direktivom i opravdano nakon odgovarajuće procjene. Za određene važne regulisane profesije, uglavnom u sektoru zdravstva, mora biti osiguran minimalni nastavni program obuke u saradnji sa relevantnim institucijama za obuku. Te kvalifikacije se na osnovu takvih nastavnih programa automatski priznaju u svim državama članicama EU. Konačno, potrebno je uzeti u obzir periodični pregled nacionalnih propisa u skladu sa članom 59. Direktive.

Daljnje mjere

Direktiva o uslugama takođe zahtijeva od država članica da preduzmu mjere u vezi sa preispitivanjem pravnih propisa i procesom zajedničke procjene kao što je utvrđeno članom 39. Direktive. *Acquis* u ovom poglavlju takođe predviđa pravila o **regulisanim zanimanjima** kako bi se obezbijedilo uzajamno priznavanje kvalifikacija između država članica. Za određena regulisana zanimanja mora se sprovesti minimalni zajednički program obuke, kako bi se kvalifikacije automatski priznale u svim državama članicama EU. Direktiva 2005/36/EZ, usvojena 7. septembra 2005. godine, predstavlja ključni pravni akt u ovoj oblasti. Ova Direktiva zamijenila je petnaest postojećih u oblasti priznavanja stručnih kvalifikacija.

Kada su u pitanju **poštanske usluge** *acquis* ima za cilj podsticanje konkurencije u ovom sektoru na postepen i kontrolisan način, unutar regulatornog okvira koji obezbjeđuje pružanje pristupačne univerzalne poštanske usluge određene kvalitete i uspostavljanje unutrašnjeg tržišta poštanskih usluga. Glavni akt *acquis-a* je Direktiva o poštanskim uslugama (Direktiva 97/67/EZ izmijenjena i dopunjena Direktivom 2002/39/EZ i Direktivom 2008/6/EZ). Na osnovu treće Poštanske direktive (Direktiva 2008/06/EZ), postignuto je potpuno otvaranje tržišta u cijeloj EU do 2013. godine. Uspostavljanje nezavisnih nacionalnih regulatornih organa (NRO) u ovoj oblasti, predstavlja ključnu tačku pravilnog sprovođenja pravnih propisa EU i dobrog funkcionisanja nacionalnih tržišta poštanskih usluga, a na kraju i unutrašnjeg poštanskog tržišta.

Acquis uključuje dvije važne direktive koje se odnose na poslovno nastanjivanje i privremeno pružanje advokatskih usluga. Radi se o **Direktivi 77/249/EZ o olakšavanju djelotvornog obavljanja advokatske djelatnosti u smislu slobode pružanja usluga i Direktivi 98/5/EC o olakšavanju stalnog obavljanja advokatske prakse u državi članici različitoj od one u kojoj je stečena kvalifikacija**. Ove dvije direktive stvaraju vrlo otvoren i efikasan sistem za prekogranično kretanje advokata, koji mogu koristiti zvanje iz svoje matične zemlje, a pomogle su u stvaranju veoma dinamičnog tržišta pravnih usluga u EU.

Sporazum o stabilizaciji i pridruživanju je već postavio određene obaveze u oblastima iz ovog

poglavlja. Prilikom pružanja odgovora na postavljena pitanja, navedite stanje sprovođenja ovih obaveza.

I. PRAVO POSLOVNOG NASTANA

i

II. SLOBODA PRUŽANJA PREKOGRANIČNIH USLUGA

A. Opšte informacije

1. Na koji način organi vlasti Bosne i Hercegovine obezbjeđuju jedinstveni ekonomski prostor za usluge u čitavoj zemlji? Navedite kako je zakonodavstvom definisana raspodjela nadležnosti između različitih nivoa vlasti i opišite koje institucije su nadležne za ovo pitanje.
2. Da li još uvijek postoje ikakve prepreke slobodnom kretanju usluga unutar zemlje? Ukoliko postoje opišite ih i navedite tačno koje su prirode (pravne, tehničke ili administrativne).
3. Analizirajte razlike i navedite rezultate poređenja između:
 - a) tretmana koji nudite trećim zemljama u pogledu poslovnog nastana supsidijarnih društava i prava poslovnog nastanjivanja unutar EU;
 - b) tretmana koji dajete supsidijarnim društvima stranih društava s poslovnim nastanom u Bosni i Hercegovini i tretmana koji EU daje supsidijarnim društvima stranih društava s poslovnim nastanom na njenoj teritoriji;
4. Da li vršenje usluga ili pristup obavljanju uslužne djelatnosti podliježe nekom od sljedećih zahtjeva (bilo putem postupaka odobravanja (vidjeti u nastavku teksta) ili odvojeno)?
 - a) Zahtjevi koji su direktno ili indirektno zasnovani na državljanstvu ili, u slučaju privrednih društava, lokaciji registrovanog sjedišta društva, posebno uključujući: (a) zahtjeve po pitanju državljanstva pružaoca usluge, njegovog osoblja, akcionara ili članova upravnih ili nadzornih organa pružaoca usluge; (b) zahtjev da pružalac usluge, njegovo osoblje, akcionari ili članovi upravnih ili nadzornih organa pružaoca usluge imaju stalno prebivalište na toj teritoriji;
 - b) zabrana poslovnog nastanjivanja u drugoj državi osim Bosne i Hercegovine, unošenja u registre ili učlanjenja u stručne organe ili udruženja drugih država (članica);
 - c) ograničavanje pružaoca usluge u slobodi izbora između glavnog i sekundarnog poslovnog nastana, a posebno obaveza pružaoca usluge da ima glavni poslovni nastan u Bosni i Hercegovini, ili ograničavanje u slobodi izbora između poslovnog nastana u formi agencije, ogranka ili supsidijarnog društva;
 - d) pojedinačna primjena ekonomskog testa kojim izdavanje odobrenja podliježe dokazivanjem postojanja ekonomske potrebe ili zahtjeva tržišta, procjena potencijalnih ili trenutnih ekonomskih uticaja aktivnosti ili procjena podobnosti takvih aktivnosti u odnosu na planirane ekonomske ciljeve koje je postavio nadležni organ;
 - e) direktno ili indirektno učešće konkurentnih operatora, uključujući konsultativne organe, u izdavanju odobrenja ili u usvajanju drugih odluka nadležnih organa, sa izuzetkom stručnih organa, udruženja ili drugih organizacija kada nastupaju kao nadležni organ; ova zabrana se ne odnosi na konsultovanje organizacija kao što su

- privredne komore ili socijalni partneri, po pitanjima koja se ne odnose na individualne primjene odobrenja ili konsultacije javnosti uopšte;
- f) obaveza obezbjeđivanja ili učestvovanja u davanju finansijske garancije ili zaključivanju osiguranja sa pružaocem usluge ili organom s poslovnim nastanom u Bosni i Hercegovini (*u smislu da finansijske garancije ili osiguranja upisana kod organa s poslovnim nastanom u drugoj državi, koja pokrivaju aktivnosti u Bosni i Hercegovini, neće biti prihvaćena*).
 - g) obaveza preregistracije, u datom periodu, u registrima koji se vode na njihovoj teritoriji ili prethodnog obavljanja aktivnosti u Bosni i Hercegovini tokom datog perioda.
5. Navedite da li vaš pravni sistem obezbjeđuje pristup uslužnim djelatnostima ili obavljanju ovih djelatnosti u skladu sa bilo kojim od sljedećih nediskriminatorskih zahtjeva i navedite obrazloženje za svaki od zahtjeva:
- a) kvantitativna ili teritorijalna ograničenja, posebno u formi ograničenja određenih u pogledu stanovništva ili minimalne geografske udaljenosti između pružalaca usluga;
 - b) obaveza pružaoca usluge da usvoji posebnu pravnu formu – ako je tako, navedite posebne pravne forme koje se zahtijevaju i njihove glavne karakteristike;
 - c) zahtjevi koji se odnose na učešće u kapitalu privrednog društva ili pravo glasa – ukoliko je tako navedite u kojim sektorima;
 - d) zahtjevi, osim onih o pitanjima obuhvaćenim Direktivom 2005/6/EZ ili predviđenim drugim instrumentima EU, koji rezerviraju pristup predmetnoj aktivnosti pružanja usluga za određene pružaoce usluga, po osnovu posebne prirode aktivnosti;
 - e) zabrana posjedovanja više od jednog poslovnog nastana na teritoriji Bosne i Hercegovine;
 - f) zahtjevi kojima se utvrđuje minimalan broj zaposlenih;
 - g) fiksne minimalne i/ili maksimalne tarife koje pružalac usluge mora da ispuni – ako je tako, navedite u kojim sektorima;
 - h) obaveza pružaoca usluge da, zajedno sa uslugama koje pruža, pruži i druge posebne usluge;
6. Navedite da li pravni sistem ograničava vršenje uslužnih djelatnosti zajedno ili u partnerstvu i na kraju objasnite opravdanost takvih ograničenja.
7. Navedite da li odredbe, koje propisuju obavezu pružaoca usluga da zaključi osiguranje profesionalne odgovornosti, predviđaju istovrijedno osiguranje ili garantuju zahtjeve iz matične zemlje pružaoca usluga.
8. Kakva je poređenja vaša država napravila između svojih pravnih propisa kojima se uređuje ulazak i zapošljavanje državljana trećih zemalja kao „ključnog osoblja“ i propisa na snazi u EU? Napravite pregled razlika između domaćeg i prava EU u vezi sa ovim pitanjem u formi tabele.
9. O režimu koji se primjenjuje na prekogranične pružaoce usluga: Da li pojedinac ili privredno društvo s poslovnim nastanom u državi članici EU ima mogućnost pružanja usluga na teritoriji Bosne i Hercegovine bez supsidijarnog društva s poslovnim nastanom na toj teritoriji? Da li vaše zakonodavstvo pravi razliku između zahtjeva koji se primjenjuju na privredna društva iz EU koja žele da pružaju usluge putem poslovnog nastana u Bosni i Hercegovini, i onih koja žele da pružaju prekogranične usluge putem

poslovnog nastana u državi članici EU? Ako je to tako, u čemu je razlika? Dajte primjere po sektorima.

10. Jedinstvene kontakt tačke: Da li postoji jedinstvena kontakt tačka (*Point of Single Contact - PSC*), gdje privredna društva mogu elektronskim putem dobiti informacije o zahtjevima koji se primjenjuju na društva koja žele da pružaju usluge? Ako postoji, da li informacije o tim zahtjevima, koje su dostupne u jedinstvenoj kontakt tački, prave razliku između zahtjeva koji se postavljaju pružaocima usluga sa poslovnim nastanom u Bosni i Hercegovini i onih koji pružaju prekogranične usluge putem poslovnog nastana u drugoj državi (vidjeti prethodno pitanje)?
11. Da li su pružaoci usluga u mogućnosti da elektronskim putem završe neke od procedura koje se smatraju neophodnim za pružanje usluge?

Sistemi odobrenja

12. „Sistem odobrenja“ podrazumijeva svaku proceduru po kojoj se od pružaoca ili primaoca usluge zahtijeva da preduzme korake u cilju dobijanja formalne odluke ili odluke koja se podrazumijeva od nadležnog organa, za pristup uslužnoj djelatnosti ili njenom obavljanju. Koji su glavni horizontalni ili sektorski sistemi odobrenja koji se primjenjuju na sva preduzeća koja žele da trguju unutar ili sa Bosnom i Hercegovinom? Ako postoje, molimo da za svaki sistem ovlašćivanja navedete sljedeće:
 - a) Kojom se politikom opravdava svaki od sistema odobrenja?
 - b) Opišite detaljno proceduru za dobijanje predmetnog odobrenja kod ovakvih sistema. Koliko je vremena potrebno da bi se dobilo svako od navedenih odobrenja?
 - c) Da li se za dobijanje odobrenja plaća naknada? Ako je to slučaj, molimo navedite iznos naknade. U slučaju različitih naknada koje se primjenjuju prema sektoru/vrsti aktivnosti, navedite cijelu listu naknada.
 - d) Da li je zahtjev za izdavanje dozvola povezan sa obaveznim članstvom u privrednoj komori, trgovinskom udruženju ili drugom organu? Ako ovo članstvo obuhvata naknadu, molimo navedite iznos naknade.
 - e) Koje uslove treba ispuniti za dobijanje dozvole ili odobrenja? U kojoj mjeri se uzimaju u obzir zahtjevi koje je preduzeće već ispunilo u državi svog poslovnog nastana?

III. POŠTANSKE USLUGE

A. Opšti pravni okvir

13. U kojoj mjeri je vaš pravni okvir, kojim se utvrđuju poštanske usluge, usklađen sa važećim *acquis*-em EU (Direktiva 97/67/EZ izmijenjena i dopunjena Direktivom 2002/39/EZ i Direktivom 2008/6/EZ)? Navedite pojedinosti o režimu izdavanja dozvola; pružanju univerzalne usluge; rezervisanom području; zahtjevima koji se odnose na tarifne principe; transparentnosti i odvajanju računa za pružaoce usluga; standardima za nadzor kvaliteta poštanskih usluga (npr. EN 13850); uspostavljanju nezavisnog državnog regulatornog organa u sektoru poštanskih usluga.
14. Imate li neke planove za izmjenu postojećeg zakonodavstva i/ili restrukturiranje poštanskih usluga? Dostavite detalje i vremenski raspored aktivnosti.

B. Obaveze pružanja univerzalne usluge

15. Koji je obim pružanja univerzalne poštanske usluge u Bosni i Hercegovini?
- a) Koliko često je poštu potrebno dostaviti u skladu s obavezom o pružanju univerzalne usluge?
 - b) Da li su poštanske usluge oslobođene plaćanja PDV-a i koji je obim izuzeća?
 - c) Koji su vaši standardi kvaliteta usluge (planirani ciljevi za prelazno vrijeme vršenja usluge)?
 - d) Da li postoje pravila koja zahtijevaju određeni broj pristupnih tačaka i kontakt tačaka (poštanski kovčežić i pošte)? Precizirajte.
 - e) Da li postoje izuzeci od obaveze pružanja univerzalne usluge? Precizirajte.

C. Režim izdavanja dozvola i odobrenja

16. Kako se režim izdavanja dozvola primjenjuje u Bosni i Hercegovini, posebno na odobravanje, nadzor i oduzimanje opštih odobrenja i pojedinačnih dozvola (molimo da se pozovete na član 9. Direktive o poštanskim uslugama)?
17. Koliko poštanskih operatera imate? Ukoliko je moguće navedite vrstu usluga koje pružaju (pismo, paket itd.)

D. Rezervisano područje

18. Postoji li rezervisano područje? Ako postoji da li se rezervisane usluge pružaju kao de facto monopol ili su definisane u sklopu zakonodavstva o poštanskim uslugama?
19. U slučaju posljednje navedenog, na koji način su odgovarajući zahtjevi definisani propisima?

E. Pružalac univerzalne usluge

20. Kako su u vašoj državi definisane obaveze pružaoca univerzalne usluge? Kada je usvojen odgovarajući pravni okvir i u kojem obliku? Navedite odgovarajuće odredbe.
21. Koliko pružalaca univerzalnih usluga postoji i koji obim pokrivaju?
22. Na koji način se nadgleda pružanje univerzalne usluge od strane pružaoca univerzalne usluge, naročito u pogledu odobravanja izuzeća ili odstupanja od zahtjeva koje moraju zadovoljiti univerzalne usluge? Da li taj nadzor obavlja državni regulatorni organ ili drugi nadzorni organi?
23. Da li je predviđena djelimična ili potpuna privatizacija pružaoca univerzalne usluge?

F. Tarife za univerzalnu uslugu

24. Opišite tarifnu strukturu za univerzalnu uslugu i način na koji se ona definiše, uključujući sve važeće zakonske odredbe.

G. Računovodstvo

25. Da li se već primjenjuju sistemi za nadzor i kontrolu računovodstvenih zahtjeva na pružaoca univerzalnih usluga (sistemi za obračun troškova i odvajanje računa)? Ako ne, koji je vremenski okvir za njihovu primjenu?

H. Kvalitet usluge

26. Ko propisuje standarde kvaliteta za pružaoca usluga i ko ih nadgleda?

27. Da li se povremeno nadgleda učinak pružaoca univerzalne usluge (mjerenje kvaliteta usluge prema standardima propisanim za domaću i prekograničnu poštu i osiguravanje ispravaka ako je potrebno)? Ako to ne čini državni regulatorni organ, koji organ je za to nadležan?

I. Žalbeni postupak

28. Koje glavne mjere su preduzete za uspostavljanje žalbenih postupaka? Ko uspostavlja sistem žalbenog postupka (npr. samo pružalac univerzalne usluge, pružalac univerzalne usluge i drugi pružaoci poštanskih usluga, itd.)?

J. Državni regulatorni organ

29. Da li je uspostavljen državni regulatorni organ u sektoru poštanskih usluga? Ako jeste, odgovorite na naredna pitanja za svaki od državnih regulatornih organa koji postoje u državi i napravite pregled pravnih akata kojima su uspostavljeni i koji regulišu njihov rad.

30. Da li je državni regulatorni organ nezavisan? U kojoj mjeri je on nezavisan od pružalaca univerzalnih usluga? Na koji način i u kojoj mjeri se obezbjeđuje njegova operativna nezavisnost?

31. Dostavite podatke o organizaciji nadležnog organa, uključujući broj zaposlenih. Planirate li jačanje ljudskih resursa (u smislu ekvivalenta punom radnom vremenu) koji se bave poštanskim uslugama dostupnim ovom organu? Ukoliko planirate, molimo navedite očekivani rok.

32. Da li državni regulatorni organ ima odgovornosti slične onima koje propisuju *acquis* EU za evropske nacionalne regulatorne organe?

33. Kakvi su postupci imenovanja i mandat rukovodioca nacionalnog regulatornog organa? Koja ovlašćenja ima nacionalni regulatorni organ?

34. Da li postoji više regulatornih organa koji se bave različitim aspektima poštanskih usluga, npr. posebnim regulatornim pitanjima, tarifnim režimima i cijenama, tržišnom konkurencijom, itd? Ako postoji precizirajte koji organ je nadležan za svako od regulatornih pitanja i navedite koji pravni akti se odnose na njihovo uspostavljanje i njihovo djelovanje.

IV. UZAJAMNO PRIZNAVANJE STRUČNIH KVALIFIKACIJA

A. Osposobljavanje

35. Koliko traje i koji je sadržaj (nastavni plan i program) osposobljavanja za profesiju i/ili obavljanje profesije ljekara, medicinske sestre za opštu zdravstvenu njegu, stomatologa, babice, veterinara-hirurga, farmaceuta i arhitekta, ako se uzmu u obzir zahtjevi utvrđeni za navedene profesije u Glavi III Poglavlja 3 (članovi 24, 25, 28, 31, 34, 35, 38, 40, 44 i 46) Direktive 2005/36/EZ o priznavanju stručnih kvalifikacija?

36. Da li su stomatološka i medicinska profesija dvije pravno različite profesije? Navedite detalje.

37. Da li profesija babice postoji kao posebna profesija, pravno različita od profesija medicinskih sestara i doktora? Navedite detalje.

B. Bavljenje profesijom/profesionalnom djelatnošću

38. Koje profesije/profesionalne djelatnosti su regulisane vašim zakonodavstvom (vidjeti definiciju regulisanih zanimanja u članu 3(1)(a) Direktive 2005/36/EZ)? Koji je okvir područja profesionalnog djelovanja?

39. Kako su te profesije regulisane? Da li su propisima posebne djelatnosti rezervisane za kvalifikovane osobe? Da li je zaštićen i naziv profesije?
40. Koje su djelatnosti koje su rezervisane za svako od zanimanja koja su regulisana?
41. Za koja zanimanja je pristup rezervisan samo za državljane Bosne i Hercegovine i iz kojih razloga je takva rezervacija propisana?
42. Koji su regulatorni organi za svaku od regulisanih profesija? Postoji li nadzorni organ?
43. Da li je potrebna registracija u komori za svaku od regulisanih profesija?
44. Postoji li poseban režim za priznavanje stranih stručnih kvalifikacija?
45. Postoji li neka razlika u vašem zakonodavstvu između priznavanja stručnih kvalifikacija i priznavanja kvalifikacija za akademsku svrhu, odnosno priznavanja u smislu nastavka dodatnog studiranja u Bosni i Hercegovini?
46. Kakvi su vaši planovi za usklađivanje zakonodavstva sa Direktivama EU o pružanju advokatskih usluga (Direktive 77/249/EEZ i 98/5/EZ)?
47. Kakvi su vaši planovi za usklađivanje zakonodavstva sa Direktivama EU o toksičnim proizvodima (Direktive 74/556/EEZ i 74/557/EEZ)?

C. Administrativne strukture

48. Molimo opišite administrativne strukture i postupke za priznavanje stranih stručnih kvalifikacija u Bosni i Hercegovini?
49. U kojoj mjeri je moguće sprovesti administrativne postupke elektronskim putem?